

# Powšitkowne WOZJEWJENJA

njedzeli, 3. septembra 2017

## Duchowna hudźba

W Budyskej tachantskej cyrkwi zaklinči njedzeli, 3. septembra, we 18 hodź. duchowna hudźba ze skupinu Hušćanskich hońtwjerskich dujerjow, zesylnjenej z dujerjami z Lejnoho pola Wojerec. Pod nawodom Andreje Ende zanjesu mjez druhim Hubertusowu mšu. Budyski Rotarijowy klub je financowanje hudźbnikow přewzał, tak zo móže so wša kolekta tutoho wječora za ponowjenje Eulowych piščelow w ewangelskim džělu tachantskeje cyrkwy wužić.

## 25 lět Dom biskopa Bena w Smochćicach

Składnostnje 25lětneho wobstaća přeprašuje Dom biskopa Bena w Smochćicach njedzeli, 10. septembra, wutrobnje na swójbny swjedzeń. Wón zahaji so w 10.30 hodź. ze swjatočnej Božej mšu, kotruž změje starobiskop Joachim Reinelt.

Wot 13 do 16 hodź. wočakuje wopytowarjow pisany program za wšitke starobne skupiny. Z džaknym nyšporom, kotryž změje biskop Heinrich Timmerevers w 16.30 hodź., swójbna njedzela w Smochćicach wuklinči.

## Patronatna a džakna Boža mša

Wutrobnje přeprašamy wěriwych na džaknu Božu mšu póndzeli, 18. septembra, w 10.00 hodź. do Chróšćanskeje cyrkwy. Wobydlerjo a sobudžělačerjo Domu swjateje Ludmile spominaja lětsa džakowni na wotewrjenje domu we Swinarni před 40 lětami a přečah do noweho domu w Chróšćicach před 15 lětami. Božu mšu změje starobiskop Joachim Reinelt w koncelebraciji z dalšimi duchownymi. *Wendelin Brězan*

## Nyšpor z požohnowanjom konjacych zapřahow

Towarstwo Cyrila a Metoda, sekcija wěda a skutk, přeprašuje tež lětsa na wosebity nyšpor domchowanki z požohnowanjom konjacych zapřahow, ke kotremuž přijědze tež Drježdžansko-Mišnjanski biskop Heinrich Timmerevers. Nyšpor budže njedzeli, 24. septembra, w 14 hodź. w Chróšćicach na łuce při Hatkach. Chróšćanski cyrkwinski chór a wosadni dujerjo jón wuhotuja.

## Zetkanje młodžiny biskopstwa

Lubi młodostni, štóž ma lóšt so na wulkim zetkanju młodžiny biskopstwa wot pjatka do soboty, 15. do 16. septembra, we Wechselburgu wobdžělić, njech so hač do póndzele, 11. septembra, z mailku na Don.Boskowy-dom@t-online.de we Worklecach přizjewi. Wotjědzemy pjatk w 20 hodź. zhromadnje do Wechselburga a sobotu popołdnu něhdže w 16 hodź. zaso wróćo. Jězba płaci pjeć eurow na wosobu. Městna su wobmjezowane. Nadrobnije informacije k wotběhej zetkanja nańdžeće w interneće pod <http://www.kathjusa.de/bistumsjugendtag-sei-dabei/>.

*Wutrobnje strowitaj farar Gabriš Nawka a Lucija*

## **Pytaja serbskeju referentow za młodzinu a dźěći**

W dekanatnym dušepastyrstwe we Worklecach matej so dvě dźělowej městnje nachwilnje znowa wobsadzić. W decembru ma so referent respektiwne referentka za dušepastyrstwo młodžiny a hnydom referent respektiwne referentka za dušepastyrstwo dźěći přistajić. Za wobě městnje je socialnopedagogiska abo teologiska kwalifikacija trěbna. Wuměnenja su dobre znajomosće w młodžinskim, dźěćacym abo kubłanskim dźěle, wobknježenje serbskeje rěče, zwólniwosć, tež wječor abo kónc tydzenja dźělać, a přezjednosć z nadawkom, službu a žiwjenjom katolskeje cyrkwy. Dźělowej městnje stej w Don Boskowym domje we Worklecach. Link na nadrobne wupisanje dźěloweju městnow nańdu zajimcy pod [www.posol.de](http://www.posol.de). Pisomne požadanja přijimuje hač do wutory, 5. septembra, biskopski ordinariat, personalny wotrjad, Käthe-Kollwitz-Ufer 84, 01309 Drježdźany abo z mailku na [bewerbung@ordinariat-dresden.de](mailto:bewerbung@ordinariat-dresden.de).

## **Mjezynarodnje warić**

Na kulinariske wokřewjenje přeprošuja Budyski Šulski centrum Charity, Hornjołužiski zwjazk Charity z.t. a Budyska wosada swjateho Pětra. Ludžo ze wšelakich krajow swěta přihotuja jědže zhromadnje w internace Šulskeho centruma Charity, Před Šulerskimi wrotami 21 (zachod z Grólmusoweje). Předwidžane je, zo warja na srjedomaj, 6. septembra, francosce a 4. oktobra lybisce, spočinajo stajnje w 17 hodź. Zetkanje z warjenjom syriskeje jědže budže srjedu, 20. septembra, ale hižo w 16 hodź. W zwisku z Mjezykulturnym tydzenjom scěhuje samsny džeń přednošk wo žiwjenju žonow w Syriskej.

## **Jězba do Naumburga**

Dekanatne dušepastyrstwo přeprošuje dźěći 5. a 6. lětnika wot pónđzele do štwórtka, 9. do 12. oktobra, na jězbu do Naumburga. Wot kóždeho wobdźělnika zběra so přinošk we wysokosći 75 eurow. Zajimcy njech so hač do štwórtka, 28. septembra, we Worklecach pod telefonowym čisłom (03 57 96) 8 87 07 přizjewja.

## **Mjezynarodne putnikowanje ministrantow do Roma**

Mjezynarodne putnikowanje ministrantow do Roma budže klětu wot 29. julija do 4. awgusta. Ministranća, kotřiž chcedža so wobdźělić, dyrbja potom znajmjeńša 13 lět stari być. Přinošk wučinja 395 eurow. Starši njech wobkedźbujaju termin při planowanju dowola.